

G.M. and Others v. the Republic of Moldova (br. 44394/15), 22.11.2022.¹

Povreda člana 3. EK (materijalni i proceduralni aspekt)

Podnositeljice predstavke su tri državljanke Moldavije. Dvije su rođene 1984. godine, a jedna 1973. godine.

One imaju intelektualne smetnje različitog stepena težine i sve su u određenom trenutku institucionalizovane u neuropsihijatrijskom rezidencijalnom centru u Bălți.

Nakon što ih je u raznim prilikama silovao jedan od glavnih doktora u navedenoj ustanovi, dvije podnositeljice predstavke tvrde da su ostale trudne, a sve tri tvrde da su bile prisiljene na pobačaj i da im se bez njihovog pristanka ugrade intrauterusni ulošci (spirale).

Pozivajući se na član 8 (pravo na poštovanje privatnog i porodičnog života) Evropske konvencije, podnositeljice se žale da su bile podvrgnute prisilnim pobačajima i mjerama kontrole rađanja i da vlasti nisu sprovele efikasnu istragu o ovom pitanju.

Sud je posebno utvrdio da vlasti nisu sprovele efikasnu istragu navoda podnositeljica predstavke o zlostavljanju uprkos tome što su istragu otvarali u četiri navrata nakon njihovih žalbi. Istraga nije uzela u obzir njihovu ranjivost kao intelektualno onespobljenih žena izloženih seksualnom zlostavljanju u institucionalnom kontekstu.

Utvrdio je da domaće krivično pravo nije pružilo efikasnu zaštitu od takvih invazivnih medicinskih intervencija koje su sprovedene bez validnog pristanka pacijenta.

Ciçek and Others v. Türkiye (br. 48694/10, 74018/11, 29254/12, 77545/12 i 81601/12), 22.11.2022.

Povreda člana 11. EK

Predmet se odnosi na predstavke koje je podnijelo pet turskih državljana (rođenih između 1965. i 1990. godine) osuđenih na kazne zatvora zbog učešća u demonstracijama koje su navodno održane po nalogu PKK (Kurdistanske radničke partije, ilegalne oružane organizacije) na različite datume između 2006. i 2009. godine.

Pozivajući se na članove 10 (sloboda izražavanja) i 11 (sloboda okupljanja i udruživanja) Konvencije, podnosioci predstavke se žale na osudu i kaznu za učešće u demonstracijama.

¹ Informacije su pripremljene u saradnji između Ustavnog suda Bosne i Hercegovine i Odjela za sudsku dokumentaciju i edukaciju Sekretarijata Visokog sudskog i tužilačkog vijeća Bosne i Hercegovine. Iste su informativnog karaktera i ne obavezuju Sud.